

# Ove Philemon Mi Kumbusira

---

<sup>1</sup>Na Paul. Na Iesu Keriso awasedo gajari oro da atima ena. Namonde ingodenaso namendi Timothy de nango etoto emimi ove eiawa iso yei Philemon nangoda otao edo nangoda kondade ari embo iso yei gaiera. <sup>2</sup>Nango etoto Iesu gebe ari embobo iso mando da dada edo era edo ingodenaso ru Apphia de Archippus Keriso da isoro embo teta ingodena Keriso da isoro embobo awodo da yei daedo ove eiawa gaiera. <sup>3</sup>God ingodenaso Mama de Bada Iesu Keriso de mi iso yei ewamei ore edo iso yei jo jamo jamo ari itore.

## PAUL PHILEMON EMBO GOD DOIO SISIRA

<sup>4-5</sup>Namendi Philemon iji berari na God manunugurise i awa kotedo ena. Edo na imo kotise God da yei doio sedo ena ainda be awa na ingena imo awa Bada Iesu tumonda ise edo God da embo berari dubo buresa awasedo. <sup>6</sup>Edo na God da yei sedo gosena imo kondade ari embo nenei da yei iso tumonda ari Keriso da yei awa kiki dirise amimi aso ungodu jiro awa Keriso mi ingodenaso yei ewamei ari jiwa itido ira amimi beda are. <sup>7</sup>Edo imo embo nenei dubo buresa amimi iri na jo iaviri de atena. Edo God da embo berari imo embo iaviri era.

## PAUL PHILEMON MI ONESIMUS KONDADE ARASE SEDO GOSISIRA

<sup>8</sup>Awasedo naso namendi na Keriso da goroba mi imo ro asase sano adesa amone inono na. <sup>9</sup>Awarate na dubo bari mi iso yei sasainbari mi sedo gano adesa. Na Paul awa boroko embo ogo edo gajari oro da ainda atena ainda be awa na Keriso da buro edo isena awasedo. <sup>10</sup>Edo na Onesimus da jawo da iso yei ge sena. Na gajari oro da ainda atise na God da emboro awa Onesimus da yei atopapotisena. Edo umu emboro ainda tuturo edo pepeta edo umu awa teta nasomei inge etiri edo na uso mamu inge isena. <sup>11</sup>Edo matu umu imo embo buro ari awa inono ae isira te boroko umu imo de namonde awa embo buro inono da adira gio.

<sup>12</sup>Edo na umu boroko iso yei sekago iteno mambutira. Edo imo iaviri de na bae etesa da awodo umu kumbuio ainda be awa na umu ititena awa

teta naso jo poporo awa iso yei itari inge ena. <sup>13</sup>Edo na binga ewamei awa embo gajari oro da atena. Edo umu iso jawo da na kondade arase sedo na umu einda nangae atarase dipapa isena. <sup>14</sup>Awarate na inemi na kondade asase engega aera te na dipapa ena iso jo da dipapa mi kondade ari buro awa asase. Awasedo imo awara sae etesa awa na umu sedo gano atae etira.

<sup>15</sup>Edo na kotena awasi God mi Onesimus awa ingo iji tupo dodo edo umu engenembadira awa ingo de matawa atarase ta rora etira. <sup>16</sup>Edo matu awa umu iso agipo embo isira te boroko awa uso buro agipo embo da buro awa derigurira. Edo umu awa ingodenaso namendi Keriso da jawo da etira. Edo na umu dubo budo ena te imo umu dubo be badesa ainda be awa umu iso agipo embo edo iso namendi Bada da jawo da awasedo.

<sup>17</sup>Awasedo imo ingaena Iesu da buro awa tega kondade mina ara edo ena awa sadesa gido awa Onesimus iso yei engenembari imo na atega ae etesa da awodo awa umu atega adesa. <sup>18</sup>Edo Onesimus iso rora topo awa usibesi isita ko iso yei gano budo mina itae isiri? Umo awodo adira awa nanemi uso jawo da mina itadena. <sup>19</sup>Na naso ingo mi eiawa jivena, na Paul mi umu iso rora budo mina itae isira awa itadena. Awarate na mana imo naso yei budo mina itae isesa awa mana sadena. Imo gosesa imo God da emboro pepeta ise gari seka burisesa awasedo imo naso yei rora budo mina itae atima esa. <sup>20</sup>Awasedo naso namendi sedo gosena na awa embo ro iso yei sedo gosena awa eio. Edo imo Keriso awasedo eio. Edo imo awa naso namendi Keriso da jawo da awasedo adesa amimi ari na iaviri adena.

<sup>21</sup>Edo na eiawa jivena awa na gosena na ro sena awa adesa awa gosena. Edo awa gosise na daedo gosena imo ari nenei ewagaewa adesa awa. <sup>22</sup>Edo ge nei sedo gane. Edo imo de embo nenei de mi God da yei sedo gosewona unemi ari na gajari oro awa dodo ingoda yei buganase sewowa awasedo imo iso mando da na awa embo ewari yei sia eio.

<sup>23</sup>Edo Epaphras Iesu Keriso awasedo umu daedo nangae da gajari oro da atira edo umu daedo imo ategurira. <sup>24</sup>Edo naso kondade ari embobo Mark de Aristarchus de Demas de Luke de daedo imo ategurera.

<sup>25</sup>Bada Iesu Keriso da ewamei ari iso yei matawa atare.

Awara  
Iso namendi  
Iesu Keriso da jawo da  
Paul